





Nic. Petraeus.  
Oratio memoriae  
Aldolphi Ducis  
Schlesv. etc. scripta.  
Reslochi 1696.



Early European Books, Copyright © 2009 ProQuest LLC.  
Images reproduced by courtesy of the Royal Library, Copenhagen.  
LN 1322 4° copy 1








Early European Books, Copyright © 2009 ProQuest LLC.  
Images reproduced by courtesy of the Royal Library, Copenhagen.  
LN 1322 4° copy 1





Early European Books, Copyright © 2009 ProQuest LLC.  
Images reproduced by courtesy of the Royal Library, Copenhagen.  
LN 1322 4° copy 1



Early European Books, Copyright © 2009 ProQuest LLC.  
Images reproduced by courtesy of the Royal Library, Copenhagen.  
LN 1322 4° copy 1



40<sup>2</sup>, -401


LN 1322

ex. 1


M













Memoriæ beatæ, virtutibus &  
rebus præclare gestis

# ILLVSTRISSIMI FORTISSIMIQUE HEROIS

AC PRINCIPIS, DN. ADOLPHI, HEREDIS  
NORVEGIÆ, DUCIS SCHLESVICI, HOLSAT-  
TIÆ, STORMARIÆ ET DITHMARSIAE,  
COMITIS OLDENBURGI ET DEL-  
MENHORSTÆ,

## ORATIO,

*scripta*—:

*Et in Academia Rostochiensi publicè  
An. c 15. 15. XCVI. XXVI. Januarii,  
natalitio hujus Herois die,  
habita—*

à

M. NICOLAO PETRAEO,  
Hufano, Holfato.

ROSTOCHII,  
TYPIS MYLIANDRINIS.



REVERENDISSIMO  
ET ILLUSTRISSIMO PRINCIPI,

DN. IOANNI ADOLPHO, POSTULATO ARCHIE-  
piscopo Bremensi, Episcopo Lubecensi, Heredi Norve-  
giæ, Duci Schlesvici, Holsatiæ, Stormariæ & Dithmar-  
siæ, Comiti in Oldenburg & Delmenhorst,  
Domino meo clementissimo perennem feli-  
citatem precor.



RATIONEM HANC, CELSISSIME  
Princeps, parenti tuo, & tibi scripsi. Parenti;  
ut ipsius memoriam renovarem, virtutes &  
res gestas celebrarem. Tibi; ut ob insignem  
tuam, quâ me complecteris, clementiâ, grati animi mei  
significationem hoc modo, cum alio non possem, declara-  
rem. De obitu parentis tui non dixi; erat enim à propo-  
sito meo alienum; cum illum alio tempore, si vitam mihi  
Deus concefferit incolumem, singulari oratione sim de-  
ploraturus. ut autem hæc oratio Celsit: tuæ eo gratior ef-  
set, publicè eam in celeberrimâ Rostochiensi Academiâ  
in frequēti clarissimorum virorum & studiosæ iuventutis  
conventu XXVI. Jan: ipso die natalitio Parentis tui habui.  
Tramitto igitur Celsi: Tuæ orationem istam; submissèq;  
oro, ut C. T. clementi eam vultu suscipiat, & me in poste-  
rum quoq; regiâ & innatâ suâ clementiâ amplexetur.  
Rostochio XXV I. Jan: An: c Io. Io. XCVI.

C. T.

Subjectissimus

M. Nicolaus Petreus, Husanus,  
Holsatus.





RECTOR ACADEMIÆ  
 ROSTOCHIENSIS  
 HENRICVS CAMERARIVS  
 Philosophiæ & f. u. Doctor &  
 Professor.

**C**elestinus dies, natalis est Illustrissimi fortissimiq; principis ac Herois, domini ADO LPHI, heredis Noruegiæ, Ducis Sclesuici, Holsatiæ, Stormariæ & Dithmarsici, &c. laudatissimæ recordationis ac memoriæ. Natus enim is princeps & Heros fortissimus est Flensburgi Anno Christi 1526. VII. Kal. Febr. hora 11. min. 30. post meridiem. Quibus virtutibus fuerit præditus, quasq; res gesserit præclaras, nimis longum est hæc referre, nec nostri instituti. Iuuenis stipendia meruit apud CAROLVM V. Imp. & obsidioni Merensi interfuit A. C. 1552. Dithmarscos, gentem penè invictam cum fratre IO HANNE & FRIDÉRICO II. patruele Rege subjugavit A. C. 1559. Militavit quoq; PHILIPPO Hispaniarum Regi in Belgico A. C. 1568. ac tandem Gottorpiæ corporis mortalis exuvii depositis in cælestem migravit aulam Kal. Octob. A. C. 1586. intra sextam & septimam matutinam, cum annos vixisset LX. menses octo, dies quatuor, horas septem, princeps magnanimus, summæq; tam bello quàm pace spectatæ virtutis. Ejus laudes vir doctissimus ornatissimusq; M. NICOLAUS PETRÆUS Husanus Holsatus persecutus est oratione eruditissimâ & elegantissimâ. Quam cum à nobis pro officio, quo in præsentî fungimur, peteret, ut potestatem recitandi publicè crastino die, utpote qui principi & Heroi fortissimo natalis est, faceremus, hoc facillè & nullo negotio impetravit, ac quidem merito. Prædicari quippe vita sanctos ac inprimis principes viros, qui Reipub. Christianæ præfuerunt ac profuerunt multū, atq; adeò ab iis, quos beneficiorum acceptorum memoriā conservare oportet, longè est acquisitum. Et quid utilius, quàm

A 2

propo-



Proponere exempla maximè nobilia, à quibus non tantum, qui summa rerum gubernacula tenent, verum etiam alii inferioris ordinis capiant, sibi quod sit ex usu? Tacemus interim fructus hujus exercitationis dicendi infinitos. Id saltem affirmamus, eà solà ferè studiosos consequi, quicquid in studiis laudabile se adepturos sperant. Laudamus ergò & summopere laudamus institutum M. NICOLAI PETRÆI, qui ob beneficia accepta magnanimiti Herôis memoriam celebrat etiam in hac Academiâ nostrâ, ac hortamur omnes liberalium artium & linguarum alumnos, id ut intueantur non modò verum etiam sequantur. Sed & orationis hujus recitationi ultrò & suâ sponte reverendos & clarissimos dominos Professores Collegas nostros, reliquosq; Doctores & Magistros, ac studiosos adolescentes, qui discendi cupidi sunt & virtutem amant, frequentissimos interfuturos certò nobis persuademus. Ac ut intersimus, hoc debemus non tantum literis ac virtuti, doctissimoq; M. PETRÆO, orationem recitanti: Verum imprimis memoriæ defuncti Principis ADOLPHI: Debemus hoc reverendissimo & illustrissimo Principi JOHANNI ADOLPHO, Archiepiscopo Bremensi, Episcopo Lubecensi, Holsatiae Duci, &c. ADOLPHI filio optimo ad patris sceptrâ jam sedenti, domino clementissimo: debemus deniq; hoc toti domui Holsaticæ illustrissimæ. Et nos imprimis majorem in modum prædicamus summam clementiam & beneficentiam, quâ illustrissimus Princeps JOANNES ADOLPHUS in arce suâ Tritou per Capitaneum suum Dn. Nicolaum à Wilche, Dn. Cancellarium Jonathan Gutsloff, & Dn. Decanum Lubecensem Ludovicum Pincier, utrumq; legum Doctorem eximium, nos unâ cum collegâ Hildebrando a Saldern, paucos ante menses, ubi Casareum expediebamus mandatū & commissionē, excepit, ac pro hac regiâ beneficentiâ ad gratitudinem perpetuam nos devinctos facemur. Quamobrem ut omnes Collegæ reliquiq; nostræ jurisdictioni subjecti cras ad horam IX. hîc nobiscum conveniant: & orationi elegantissimæ, laudibusq; defuncti ADOLPHI, Principis & Herôis fortissimi, diligenter auscultent, summopere ac vehementer eos invitamus & rogamus. Propositum Rostochii, VIII. Kal. Februa. qui conversioni D. Pauli sacer est, Anno M. D. XCVI.



# ORATIO.



QVOD IN FREQUENTI ET publicâ hac coronâ, Magnifice D. Re-  
ctor, Reverendi, clarissimi & eximii vi-  
ri, Præceptores colendi, vosq; studiosis-  
simi Juvenes, & auditores reliqui: quod,  
inquam, in frequenti & publicâ hac co-  
ronâ proferetur; si spectetis, à quo: vile & obscurum  
erit: si spectetis, de quo: amplum & illustre. Nam si  
me ob angustum annorum terminum, ob humilem in-  
genii cultum, ad hanc cathedram, & ad has voces non  
satis instructum, paratumq; esse judicaveritis, nō move-  
bor: quin & vos insuper impense orabo, ut ad istud ve-  
strum judicium adscribatis & meum. At si magnani-  
mum Herœm ADOLPHUM beatæ & sanctæ recorda-  
tionis, illustrissimum quondam HOLSATIÆ PRIN-  
CIPEM, dignum reputaveritis; cujus memoriam in hac  
cathedrâ renovem: cujus virtutes celebrem: cujus res  
præclare & fortiter gestas proponam; justitiæ oculos  
in vobis esse dicam: & illud ipsum quoq; ADOLPHI  
manibus enarrabo. Ego siquidem id præstare, non tan-  
tum ob ADOLPHI in patriam nostram merita, debeo:  
sed præterea ob Reverendissimi & Illustrissimi Princi-  
pis, IOANNIS ADOLPHI, ADOLPHI filii optimi,  
filii sincerissimi, ad patris sceptrâ jam sedētis, in me bene-  
ficia, & insignem clemētiâ, cogor & pertrahor, ut erga  
Celli: ipsius animi mei grati & memoris qualemcumq;  
significationem submisē declarem. Neq; verò quis-  
quam, ut opinor, vitio mihi vertet, quòd Principem jam  
defunctum, immortalis tamen memoriâ dignissimum, ju-

B

stis



stis extollo laudibus: cum & superioribus seculis, & hoc  
præsenti plurimos eosq; præclaros viros idem suis prin-  
cipibus, suis regibus præstitisse videamus, legamus.  
Equidem, laudare optimum principem, ac per hoc po-  
steris velut è speculâ lumen, quod sequantur, ostendere,  
multum utilitatis habet, arrogantiae nihil. Ita judicant  
omnes, qui de his talibus rectè judicât: quibus, quin vos  
quoq; accensendi sitis, cur dubitem? Quocirca vos oro,  
vos obtestor, ut me de fortissimo HEROE, ADOLPHO  
HOLSATORUM quondam Principe, hoc ipsius natali  
die exiguo temporis spatio, ex iustâ in Principem incli-  
tum & incomparabilem vestrâ affectione patienter & æ-  
quanimenter audiat. Id, ut spero, gratum domui *Holsari-*  
*es*; vobis dignum; mihi optatissimum eveniet. Dica-  
mus ergo. Sed non de ADOLPHI abavis, proavis, a-  
vis, patre, & aliis majoribus. quis enim illos non novit?  
cui ignotus est avus paternus, ut reliquos præteream,  
CHRISTIANVS I. Daniæ Rex? & hujus in regni ad-  
ministracione dexteritas, pietas, & gloria quem latent?  
quis est, cui FRIDERICI I. Daniæ Regis, patris opti-  
mi, patris celsissimi, excelsa gravitas, & in rebus omni-  
bus iustissima moderatio sint incognita? Sed non etiam  
de fratribus: nam si de his dicendum, vox & tempus  
me deficerent. Adspicite CHRISTIANVM III.  
Daniæ Regem, & hujus ô miram pietatem! impensissi-  
imum pacis studium, & regiam comitatem. Adspicite  
IOANNEM Seniore[m] Ducem Holsatiæ, hujus clemen-  
tiam, beneficentiam, & erga Scholas & Ecclesias ma-  
gnam amorem. Quales quantiç; illi Herôes! Deos è  
coelo in terras descendisse, & tùm imperiorum in his or-  
bibus administracione hominibus præfuisse dixeris.  
Virtutes igitur ADOLPHI inspiciam, & ex magno re-  
rum



rum fortiter ab illo gestarum cumulo, quasdam proponam: utraq; verè celebrabo, utraq; admirabor: ut memoriam TANTI HEROIS renovemus; ut alii cognoscant; ut alii imitentur. Et prima virtus nobis meritò PIETAS; in cuius scholâ cum à primis usq; annis fideliter educatus & institutus esset; fideliter quoq; ad ejus normam per totum vitæ cursum ad extremum usq; habitum vivebat: recto de DEO sensu, & recto in DEUM cultu. quibus duobus Pietas constat firma & integra; sine altero, mutila & manca. Sēsu recto; cū de DEO & ejus voce rectè & constanter semper sentiret, piè cum conjuge, liberis & consiliariis loqueretur. Recto cultu; cū eundem Deum ex verbo cognitum piè & purè veneraretur: verbum ejus libens, lubensq; publicè, privatimq; à verbi ministris devotè audiret: juxta illud omnes suas actiones institueret: sacrâ Domini coenâ sæpius magnâ animi humilitate uteretur. Ita totus optimus Princeps pietatis semper studiosus erat. Videbat enim diligenti experienciâ edoctus sine hac nihil in humanis stabile, nihil firmum: omnia retrò ferri, & mirabili Dei manu disturbari. Videbat principes & reges plurimos ob hujus contemptum, ob hujus neglectum, sæpè à Deo punitos; sæpè in exilium ejectos; sæpè cum totâ stirpe extinctos. Ita est. Vides paxillos, nisi benè fixi firmiter alicui fortiori adhæreant, & omne quod in eis pendeat, citò dilabi, & ipsos solutos ob infirmiolem ahæsiōnem cum oneribus ad terram proruere. Vides ita principes, nisi DEO suo conditori pertinaciter adhæserint, & ipsos, & omnes, qui eis consentiant, citò deperire. Liberos etiam suos ob ista ad hanc Divam duci, in hujus Lycéo sanctè informari & erudiri unicè volebat, acriter studebat. Amabat & colebat verbi ministros; eorundem

*Pietas*



quantò magis id in legibus observandum; quibus regna  
& imperia tota regenda & corrigenda. Causas acto-  
resq; frequenter ipse audiebat; ita, ut accusatori alteram,  
defensori alteram aurem præberet. Iræ adfectibusq; in  
causis dijudicandis non indulgebat; sed legum semper  
justitiæq; præcepta spectabat. Personarum vel gravita-  
tem, vel auctoritatem, vel opes, vel ætatem non confi-  
derans, ut sol non est alius diviti, alius pauperi; sed o-  
mnibus communis; ita unus & idem erat egeno & opu-  
lento: imò omnibus idem. Ob magnorum virorum  
preces & intercessionem rarissimè reis vitam donabat.

113. Munera contemnebat. Nemini nocebat, nisi laceffit:  
sed & tunc lentè admodum; semper consultò & medita-  
tè. Sontes & reos poenis suppliciiisq; plectebat; inson-  
tes liberabat, defendebat, erigebat; malorum omnium  
osor acerrimus; bonorum amator clementissimus. Ta-  
lis; non intra quinque annos uno tantum die, ut illi olim  
in certaminibus olympicis, sed per omnem vitam, in  
omnibus suis actionibus, in omnibus suis judiciis.

Hæc est vera justitiæ norma; hæc sana regula: ad  
quam & se & suos dirigebat. Illos verò, quos muneri-  
bus capi; quos justitiæ præcepta fallere; quos inson-  
tes premere, & personarum respectum in judiciis habere vi-  
debat, non tantum ad faciem suam non admittebat, sed  
sæpè etiam ab officio remotos puniebat. Hæc mirentur  
& magnifaciant illi, qui magnum illum justitiæ splendo-  
rem magnifaciunt & admirantur. O vitam admiran-  
dam! ô vitæ viam semper terendam! ô actiones semper  
imitandas, perpetuâ laude celebrandas! nec injuriâ, nam  
& in vulgari & plebeio homine justitiæ faciem, justitiæ  
fulgorem, & facta, quis est qui non laudet? qui non mi-  
retur? Cur non igitur in tanto quoq; Herœe, in tanto  
Prin-



Principe? Non tamen in hac justitiæ administratione erat Rhadamantus, non Minos: Sed Agesilaus & Aristides, nec leges suas sanguine scribebat, ut Draco; sed atramento, ut Solon.

Erat justitiæ cultor; sed & CLEMENTIÆ; virtutis homini omnium virtutum convenientissimæ, & humanissimæ: at nulli tamen ex omnibus magis, quàm regi, quàm principi competentis.

Crudelis non erat: sævus non erat: tyrannus non erat: clemens erat: mansuetus erat. Noverat humanam conditionem: omnes labi & peccare, quâ privatim, quâ publicè; neq; ullam legem tam validam esse, quæ hæc tolleret: nec reges; nec imperatores ipsos; nec sanctissimos quosq; sine peccato, sine errore vivere. Videbat severitatem nimiam assiduitate amittere auctoritatem: videbat sæpius vindicata, sæpius committi: sævitiam plus timoris, quàm potentiæ addere: videbat terrore venerationem malè acquiri, longeq; valentioram amorem ad obtinendum, quod vellet, quàm timorem: videbat crudelia & tyrannica imperia magis esse acerba, quàm diuturna: neminem à multis metuendum esse, quin ex multis ad eum formido recidat: videbat crudelem, bellum æternum & anceps gerere, neq; adversus, neq; ab tergo, neq; à lateribus tutum esse; sed semper in metu, aut periculo agitare: videbat potentiam sine clementiâ esse meram tyrannidem: nullâq; re homines ad Deum propitios accedere, quàm salute hominibus dandâ. Reflectebat oculos ad priora secula, quibus videbat clementiâ imperia temperantibus candida & læta omnia fuisse: etiam hostes æquiores, quàm aliis cives. Hec perspiciebat. Et considerabat summum jus, summam esse crudem; ideoq; temperabat; ideoq; mitigabat: noxios interdum eripiebat; afflictiis parcebat; lapsos erigebat; & serva-

*clementia*



servatum ibat eos ipsos, qui se erant perdituri. Imitabatur bonos agricolas: imitabatur bonos musicos. Illi non tantum rectas bonasque arbores colunt, sed illis quoque, quas aliqua depravavit causa, adminicula & pedamenta, quibus reguntur, subministrant: alias circumcidunt, ne proceritatem rami premant: quasdam infirmas vitio loci, nutriunt: quibusdam alienam umbram laborantibus coelum aperiunt. Isti chordas dissonantes non statim abjiciunt atque incidunt, sed sensim intendentes aut remittentes ad harmoniam & concentum adducunt. Hic item Princeps non tantum bonos probosque defendebat: sed & errantes & peccantes in viam reductos, suam auctoritate corripiebat: nec hos statim ferro flammamve tollebat, sed emendabiles leniter emendabat. Ostendebat omnibus, se subditorum suorum non Dominum, sed Principem; civium liberorumque, non servorum, rectorem, & patrem esse. Hac sibi omnia conciliabat; amorem cum primis subditorum: atque ex hoc non exiguam in principatu suo securitatem. Quis enim ignorat, nec excubias diligentissimas; nec tela circumstantia; nec decies mille catapultas aut arietes; nec centies mille tormenta; nec muros Babylonios, sic regna & reges tutari; quam amorem? Frangant hostes cetera vi & fraude: haec arx inaccessa: hoc inexpugnabile munimentum, munimento non egere: amore communitum esse; securitate posse frui, posse uti. Hac sibi conciliabat subditorum obedientiam: & ex hac principatus sui stabilem & immotam firmitudinem. Cui enim non est apertum, firmissimum & aeternum fere imperium esse; in quo obedientes gaudent? cui item non liquet, invisa imperia neminem retinere diu? omnia talia citò collabescere, & in chaos ruere? quod posterius ne in suum  
duca-



ducatum caderet, clementiâ cunctos amplexabatur. Sed  
certè cum iudicio. Sine quo quid aliud clementia, quam  
lentitudo? quam peccatum? quam flagitium? Secedebat  
paululum à summo iustitiæ rigore: sed secedebat; non  
discedebat. clemens erat, & tamen iustus. iustus erat,  
& tamen clemens. Clemens totus non erat; ne omnia  
jura everteret; ne pacatam vitæ societatem tyrannidi &  
latrocinii cuiusvis subiceret; ne sanctas & venerandas  
à tam illustribus maioribus pro iustitiâ datas & prolatas  
leges, aboleret; ne turpitudinis & vitiorum colluviei  
fenestras aperiret. iustus totus non erat; ne pestem &  
perniciem suæ ditioni inferret; ne tyrannidem in suos  
cives exerceret; ne ducatus sui muros, Amorem & Obe-  
dientiam, dirueret. iustus igitur erat & clemens. Trans-  
grediebatur interdum, ad clementiæ commodum, iusti-  
tiæ & æquitatis terminos: sed cautè; sed consultò; sed  
magnas ob causas. Id laudandum. Non omnia, quæ  
sciebat, omnia vindicabat: parvis peccatis veniam,  
magnis severitatem commodabat: non poenâ semper;  
sed sæpiùs poenitentia & lacrumis contentus erat. ô  
principem omni laude; ô æterno nomine dignissimum!  
quod si quis negaverit, bruta animantia advocabo, ut  
hunc conculcent; ut illud adseverent. Nos probemus.  
Ex iustitiæ stirpe in ADOLPHO FIDES pullulabat;  
imò radices altissimas agebat. quam semper suis datam  
fidè sancteq; servabat: imò & hosti datam servabat, san-  
ctamq; habebat, tam privatim, quam publicè. Hac  
maximè Romani aliarumq; gentium majorum rectores  
suam rempublicam continuerunt, firmarunt; hac item  
suam, HIC HEROS. Hanc in Capitolio vicinam jo-  
vis optimi maximi, Romani esse voluerunt: hanc item  
Princeps noster in animo suo iustitiæ adfidere. Hanc,

C

cum



*modestia*  
cūm perspiceret humani generis esse columen; & omnes  
virtutes ab hac, si sanctè colatur, ut sidera à sole, fulgè-  
re: & sine hac omnes alias heròum virtutes obscurio-  
res fieri; sanctè colebat. Cui enim umquam ille fidem  
non servavit? cui istam speratam exculsit? non etiam  
perfidis: cūm perfidiosum & nefarium duceret, hanc  
frangere, hanc contaminare. Ex clementiæ porrò stir-  
pe efilorescebat in animo ADOLPHI MODESTIA,  
lenis mitisq; animi assidua comes; cum aliis virtutibus  
hominibus omnibus commendanda; sed maximè prin-  
cipibus. quid enim isti & illi omnes aliud sunt, quàm ci-  
nis? quàm pulvis? quàm terra spiritu vivida? de cuius  
māfione cum ne ad momētum quidem certi esse possint;  
heu mihi, in quā fragili & infirmo statu versantur! ho-  
diè sceptris, coronâ, gladio, auro, gemmisq; ornati & one-  
rati ingrediuntur: cras, abeunte spiritu, linteis involuti,  
tumbæq; impositi, in cineres, in pulverem vertuntur.  
Hæc excitabant nostrum principem ad modestiam,  
quam calidè satis exercebat: perspectum enim cogni-  
tumq; habebat, famam huius neq; summis mortalium  
aspernandam; & à Deo æstimari. Sciebat omnia ca-  
dūca; incerta & fragilia: opes & vires humanas pueri-  
libus crepundiis consentaneas: sceptrâ & fasces regna  
non continere. ob hæc numquam insolefcebat; num-  
quam efferebatur: sed non minùs hominem se, quàm  
hominibus præesse agnoscebat. subditorum suorum non  
tantum animis, sed & oculis serviebat. Sermo mode-  
stus. cultus modestus: statuebat enim multò pulchritus,  
magisq; regium, animum præferre cultum & compo-  
situm, quàm corporis vestem. Fortunam lubri-  
cam esse, noverat, nec invitam teneri posse: unde  
manibus eam pressis continens, felicitati suæ frenos  
impo-



imponerebat, ut facilius eam regeret. Modestiam sic colebat; sed tamen, ut par erat, cum AUCTORITATE, cum MAIESTATE: non erat perpetuò in vulgi conspectu; ne hac satietate minùs se verendum faceret. Modestus; at etiam Magnificus: visu perfectò & auditu juxtà venerabilis.

Fastum, superbiam, & his infectos non tantum odio prosequabatur, sed etiam inter suos & in suis non patiebatur. Ex modestiâ insignis ADOLPHI profuebat COMITAS, & HUMANITAS. Loquebatur cum nobilibus; humanus erat: loquebatur cum civibus; humanus erat: loquebatur cum rusticis; humanus erat: loquebatur cum divitibus, cum pauperibus, cum eruditis; erga omnes comis & humanus. His multa tollebat; multa corripiebat; quæ alii neq; securi, neq; forcipibus correxissent: intelligebat enim nec ferrum ignitum aquæ injectum, tam citò posse extinguì, quàm hominum animos devios & inflammatos, humanitate admotâ emolliri. Comis erat; sed cum GRAVITATE: ut hac etiam suam apud subditos auctoritatem adsereret. Quid dicam de ipsius LIBERALITATE? de ipsius MAGNIFICENTIA? quam utranq; persæpè declarabat: numquam ostentabat. Illam; cum nihil hominis naturæ videret esse accommodatius: regaliusq; cum Artaxerxe Longimano addere, quàm adimere judicaret. Liberalis erat; sed cum mente; quâ semper personarum, quibus dabat, circumstantias & conditiones perpendebat: & cum modo; ne nimis hauriendo fontem ipsum exhauriret. Et illam ipsam exercebat, non inanis gloriæ, sed solius honestatis & virtutis studio: ut honestam de se famam propagaret; ut benevolentiam civium suorum sibi conciliaret; ut inopiam pauperum sublevaret.

C 2

Illam

*Comitas et Humanitas*



Istam, quis est, qui non novit? Inspiciat scholas ab illo erectas & sustentatas: inspiciat monumenta majoribus posita & dicata: inspiciat arces filiis exædificatas: inspiciat: & mirabitur.

IN AFFECTIBUS MODERANDIS DEUS bone, quam moderatus ille erat! iræ numquam, nisi ubi conveniebat, locum dabat, sed semper suppresserat; tantoperè, ut ne in ministros & servos quidem animadvertere voluerit commotior: idq; ideò, ut animi sui fortitudinem privatim etiam singulis declararet: quod sciret, fortius esse, istam superare, quàm hostem in panopliâ stantem deicere: & non minus exitii mortalibus ab irâ fieri, quàm ab hoste. Numquam in illo oculi truces; numquam in illo os turbidum & immanis clamor; numquam rubore effervescens; numquam pudenda & poenitenda verba; numquam trepidatio. Vindictam de calumniatoribus non sumebat; sed eos tolerabat & ridebat: imò cum Antigono Macedonum rege patientiâ regiâ confundebat. Convitiâ spernebat: levia; quòd putaret in gente liberâ, liberas etiam aliquo modo linguas esse debere. Placidus erat atq; tranquillius; & injurias atq; offensiones privatas supernè despiciebat. Spernebat convitiâ; ne, si secus faceret, agnita viderentur. Spernebat, ut spreta exolescerent. Ita in magnâ suâ fortunâ magnum quoq; habebat animum. FAMÆ non exiguam rationem habebat; cùm omnes principum actiones, omniaq; consilia ad hanc præcipuè dirigenda, cognosceret. Unde mirifico flagrabat studio, ut posteritati honestam sui memoriam & celebrationem relinqueret; & post mortem quoq; viveret, floreret. Ad hunc finem litteras & litterarum cultores amabat; promovebat, eisq; spiritum & sanguinem addebat. Et litteras ab



ab eo impensè amatas fuisse, eo apertum argumento;  
quòd duos filios suos nati majores FRIDERICUM &  
PHILIPPUM sanctæ recordationis; non tantum in si-  
nu suo diligentissimè institui & erudiri curabat; sed eti-  
am, quod eosdem ipse, post percepta ab illis litterarum  
rudimenta, ad prima comitia à Rupolpho Imperatore  
Augustæ indicta profecturus, in celeberrimam Acade-  
miam Heidelbergensem ad uberiores ingenii cultum  
capescendum perducebat; ibiq; eos cum egregio Holsa-  
ricorum nobilium comitatu, & clarissimo præceptore  
Antonio Caucio per biennium ferè, haud exiguo sum-  
ptu versari; & certis postea de causis ad Argenroraten-  
sem Academiā commigrare, inibiq; aliquandiu suis  
studiis operam impendere, volebat: quod & fecerunt:  
in utrâq; Academiā isto studio, ut uterq; non tantum La-  
tinam, Græcam & Gallicam linguam satis feliciter cal-  
luerit; sed etiam animum suum assiduâ & diligentissi-  
mâ historiarum lectione, & ex hac rerum memorabili-  
um in orbe passim gestarum exemplis excoluerit, in-  
struxerit, quibus ita magnanimus parens ADOLPHUS  
delectabatur, ut haud obscure omnes docti ipsius in bo-  
nas litteras amorem inde perspicerent. Nec jam profe-  
ram, quot sumptibus cænobium Bordesholmianum, &  
certos in Academiis stipendiarios quorannis sustentârît:  
nota enim illa & aperta. Sed, ut progrediamur: quid di-  
cam de singulari ipsius in rebus deliberandis & agendis  
PRUDENTIA? quid dicam? parum hic rectè ob scopum. at  
multum meritò: ut enim Cyclops apud Homerum  
oculo ab Ulyssè privatus, manus quoquo versum, nullo  
certo scopo, porrigebat: ita Princeps, cui desit pruden-  
tia, quidvis aggreditur, ingenti quidem rerum tumultu;  
sed nullo iudicio. Contra. ut, spirantibus Etesiiis,

C. 3

mare



mare tranquillum & pacatum: ita in principe, prudentiâ regnante, omnia tranquilla & florentia. Et certè omnia imperia sine hac non tantum infirma; sed ferè nulla: cum hac non tantum firma; sed vera quoq; & clara. Id huic H E R O I quoq; notum: unde vim & potentiam suam temperabat hac prudētię mixturâ: sine quâ omnis potentia abit in noxam & perniciem. Et quia videbat omnem rationem & institutionem vitæ adjumenta hominum desiderare; præcipuè verò Gubernatoriam; nec principem suâ scientiâ cuncta posse complecti: nec unius mentem tantæ molis esse capacem: nec tot & tantos principum labores posse carere adminiculis: nec unum omnia audire; nec unum omnia videre: nec eminentes viros umquam imperium suum sine adjutoribus administrasse; de suâ unius sententiâ numquam omnia gerebat; sed amicos & consiliarios in consilium assumebat. non autem quosvis; sed fidos, probos & prudentes; auctoritate, eruditione & judicio senes; usu & experiētiâ rerum instructos: semper istos; quos ad Lydium virtutum lapidem ipse tetigisset. Cum his consultabat & deliberabat: ita, ut eorum consilia & monita cautè & prudenter audiret. si bona; sequeretur: si mala; vitaret: si ambigua; inquireret. Ubi tamen semper ferè cum Marco Antonio imperatore æquius esse existimabat, ut ipse tot taliumq; amicorum consilium sequeretur, quam tot talesq; amici suam unius voluntatem. Redigebat subditos ad obedientiam: non vi, sed leni hoc prudētiæ fræno. Hujus auspiciis plura, quam telis & manibus gerebat: multa naturâ impedita expediebat. implexa verò nimisq; ardua D E O soli committebat. Verba aule blandientia numquam audiebat: occulta & familiaria consilia, ut dignitatem nullam habentia, negligebat.

In con-



In conjugio cum conjuge suâ CHRISTINA verè  
christianâ heroinâ PHILIPPI illustrissimi LANDGRA-  
VII HASSIÆ filiâ indissolubili & inculpabili amoris,  
pietatis, castitatis, & aliarum virtutum conjugium ne-  
xu semper vivebat. quæ ipsi quoq; præter filias, quinq;  
filios peperit Inter quos, CHRISTIANO ante patrem,  
FRIDERICO & PHILIPPO post patrem fato nimis  
maturo ex hac mortalitate ereptis, IOANNES ADOL-  
PHUS Archiepiscopus Bremensis, Episcopus Lubecen-  
sis, Dux Holsatiæ, &c. ad patris sui magnanimi Herôis  
gubernacula hodiè residens, magnâ pietate, justitiâ, au-  
ctoritate, amore erga litteras & litteratos, & aliis regis  
virtutibus summâ cum laude patrem suum ADOL-  
PHUM verè refert. jam tandem FORTITUDINIS,  
MAGNANIMITATIS, ET RERUM AB ADOLPHO  
GESTARUM campum ingrediamur: verè campum.  
quis enim umquam de his satis copiose, satis graviter,  
satis dignè dixerit? taceat Demosthenes; taceat Cicero:  
nam hi ipsi quoq; pro verâ harum dignitate non satis ef-  
fent dicturi, si viverent: nedum nos. Non ergò dicemus;  
sed recensebimus: non omnia; quæ enim hæc hora & hæc  
papyrus omnia caperet? sed quædam; nec fusè; sed stri-  
ctè. Audiamus. A primis statim annis satis clarè in eo he-  
roicus et magnanimus elucebat animus: ad magna et cel-  
sa natus; ad militiæ studia pronus. Oculi ardentes: facies  
gravis & severa: statura erecta & regia: vox clara & sta-  
bilis. quis ex his non magna sibi promississet? promise-  
runt sibi multi: nec vanè. Nam sub primæ juventutis suæ  
flexu & cursu, ut viam testâdis heroicis animi virtutibus  
in illustri loco latiore aperiret, sese in aulam Caroli V.  
Romanorū imperatoris potētissimi cōferebat: ibiq; stre-  
nuè, maximâq; cū laude, maxima item cum admiratione  
mili-



militabat: exteri ipsum suspiciebant: familiares venerabantur. Tot in eo virtutum regiarum lumina accensa videbantur. In castris Metensibus vidisses Achillem aut Hectorem in pugnâ; verius ipsum Martem: Nestorem aut Ulysssem in consiliis: Marium aut Scipionem in adhortationibus ad milites. quis enim ibi in rebus dubiis & lapsantibus fortitudinem & magnanimitatem ejus non est expertus? quis non ejus in agendo industriam cognovit? cui non celeritas ipsius in conficiendo profuit? Vos id novistis, ô tribunorum, signiferorum & militum manes! qui cum eo, & sub eo isti militiæ dediti eratis. Tu quoq; CAROLE Imperator, optimè istud noveras. quis enim aliter judicet? qui cōsideret tuum amorem; quo eum complectebaris: qui adspiciat tua præmia; quibus eum ornabas: qui multa alia repetat; quibus eum honorabas. Et audeo adfirmare, magnam laudis partem rerum à TE isto tempore gestarum ad ADOLPHUM pertinere: cum id tuus etiam filius PHILIPPUS Hispaniarum Rex haud obscure adfirmarit; eo argumento & signo; quod magnanimum hunc æternæ recordationis herodem ad belli difficilis & diuturni in Belgiâ societatem, regiis & magnificis sæpius promissis, & humanissimis litteris invitavit, vocavit.

Non jam memorabo quàm fortiter sese in spectaculis & certaminibus publicis certando gesserit. jacete ephippiati equites, comites, barones in pulvere, ab hoc HERÔE ex ephippiis elevati, detrusi. jacete; & mementote vos ab ADOLPHO victos & superatos. Gaudete autem, quòd non à vulgari, sed à TANTO HERÔE victi. In hac CAROLI aulâ cum clades majorum suorum à Dithmaris olim acceptas aliquoties sibi objectas audivisset: ex istâ ad suos reversus, quâ ratione ma-



ne magnas illas & nefandas injurias majoribus suis illatas vindicaret; insolentis & præfracti populi veteres etiam injurias novis indies accumulantis ferociam comperceret; & Dithmarsis rebellibus bellum commodè & feliciter inferret, consilia in animo agitabat.

Neq; diu differebat; sed CHRISTIANO III. Daniæ rege, fratre natu majore, qui hætenus pacis & quietis studio à bellicis tumultibus & lituis abhorrens dissuaserat, ex hac vitâ sublato, statim, conscriptis clam militibus, & deinde communicato cum FRIDERICO II. Daniæ rege designato fratris filio, & fratre IOANNE Seniore consilio, & iisdem in auxilium vocatis, forti & imperterrito animo bellum Dithmarsis more bellico per litteras tribus sigillis, regis ducumq; obsignatas & ad bacelli candidi cuspidem suspensas, denunciabat, & tertio post die continuò exercitum in hostium fines perducebat. Sæpius Dithmarsi, naturâ fortes & bellicosi, pro barbarâ suâ libertate fortissimè pugnant; & felicissimè: tantâ etiam audaciâ, ut aliquoties in summas angustias redacti & penè deleti, animis tamen receptis furore & insaniâ quasi agitati prælium renovarint, & victi victoriam à victoribus contra omnem spem & expectationem reportarint. Nam, ut taceam alias victorias: quis non novit HENRICUM Holsatiæ ac Stormariæ, & IOANNEM Vagriæ comites à Dithmarsis prælio superatos, & maximâ suorum parte profligatâ, cum paucissimis cruentâ fugâ hostium manibus se se eripuisse, & vitæ consuluisse? Cui non constat GERHARDUM & IOANNEM comites Holsatiæ cum quatuordecim extraneis ducibus in auxilium à se evocatis, victores jam, & aliquot mille Dithmarsorum cæsis, à victis in sacram ædem coactis, & jam igne in eadem comburendis, sed ob præ-

D

lens



sense exitium, & miserabile mortis genus in desperationem adactis, & furenti impetu ex æde illâ per ignem circumjectum in hostem proruentibus, aliisq; ex fossis hinc inde, notisq; latibulis in auxilium venientibus, debellatos? duobusq; millibus militum, & duodecim ducibus interfectis, GERHARDUM & HENRICUM MEGAPOLENSEM cum paucis aliis vix incolumes elapsos? Quem item latet exercitus IOANNIS DANIE REGIS, & FRIDERICI fratris PRINCIPIS Holsatiæ miserrima clades? quis enumerabit aut deplorabit satis tot equitum nobiliumq; fortissimorum à Dithmarsis caesorum strages? quis item satis crudeliter Dithmarsorum contra omnium penè gentium consuetudinem & mores, infandam immanitatem depinget? quâ tot heroum corpora, nullo quantumvis magno oblato argenti auriq; pondere redimi, sed feris alitibusq; in prædam relinqui & sub dio per agros in fossis lacunisq; insépulta jacere & computrescere voluerunt. Has dedecoris notas non tantum suis maioribus, sed universæ quoq; genti Cimbricæ iniustas ADOLPHUS iustissimo dolore motus abstergere, & suâ fortitudine suisq; armis vindicare tentabat. Exercitu igitur jam ad fines hostium perducto: statim ADOLPHUS heroicam animi sui fortitudinem & magnanimitatem; in militiâ singularem experientiam; in patriam incredibilem amorem, omnibus probabat: nam milites ipsos ad fortitudinem & constantiam in pugnâ hortabatur: sæpiùs eorum acies dispositas inspectabat: sæpiùs auctoritate suâ continebat: & omnium animos suâ prudentiâ & in rebus bellicis industriâ ad prælia cum hostibus committenda alacerrimos efficiebat. Ubiq; ferè præsens erat; cum sciret, strenui ducis præsentiam ad victoriam plurimum momenti habere. Nec id tantum; sed etiam fugientes retrahebat; hostes invadendos



dos & persequendos, non vitandos & fugiendos esse  
proclamabat; vitamq; suā certissimo objiciebat periculo.  
Is eras ADOLPHI animus: ea pro suis cura. Cajum Iulium  
Cæsarem mihi magnificè & verè laudant historici; quod  
in prælio quodam Martiæ legionis Aquiliferum jam ad  
fugam conversum, faucibus apprehensum in contrariam  
retraxerit partem, dextrâq; ad hostem porrectâ, eidem  
dixerit; quorsum tu abis? illic sunt, cum quibus dimica-  
mus: & sic in hoc uno vinci paratos, vincere docuerit. in  
hoc bello simile facinus commisit ADOLPHUS; sed impetu  
majori, & vehementioribus verbis. Nam cum ad HEI-  
DAM opidum Dithmarsiæ de summâ rei atrox committe-  
retur præliū, & quidam Dithmarsii tres signiferos, quum  
quarto suum vexillum eripuissent, cum sociis in fugam  
converterent, ADOLPHUS id conspicatus, heroicâ animi  
fortitudine motus, à colliculo, ad quem non procul inde  
subsistebat, cum paucis, quos ad corporis custodiam jux-  
ta se habebat, eò celerrimè properat; manu signiferos  
corripit, utq; in hostem sese convertant, inclamat; in ista  
prorumpens verba: an vos signifери atq; milites, viros  
armis exercitatos & militiæ semper deditos, tam paucis  
hostibus & militiæ ignaris, imò undiq; conclusis, & jam  
propè victis, tam turpiter terga præbere nō pudet? Estote  
memores honoris & existimationis vestrę; sistite fugā;  
signa in hostes semivictos convertite & pugnate. Et quia  
præcedētib; diebus minus obsequiosi fuerant; addebat  
& ista. Vultis novo dedecore & ignominia culpā, quam  
dudū haud levem, in itinere progredi tergiversantes com-  
misistis, accumulare & exulcerare? fortiter & intrepidè  
audendo gressus reflectite, si noxæ pristinæ & injuriæ  
memoriam abolere & extinguere cupitis. Quod si fece-  
ritis, facite autem, fidem do vobis, quæcumq; nocte  
quoq; præterlapsâ minus obsequenter minusq; rectè

D 2

â vo-



â vobis sunt perpetrata, condonata vobis omnia & obli-  
vione perenni obtrita & oblitterata esse debere. Fulmi-  
na ista erant, non verba; quorum vi, illi conversi hosti-  
bus ora vultusq; præbuerunt. De Sylla quoq; facinus pul-  
cherrimum celebratur. Cùm apud Orchomenum mili-  
tes longius evagarentur, ordinibusq; perturbatis fugam  
capesserent, ille ex equo defiliens, arrepto vexillo in ho-  
stem convolat, ita vociferans: Mihi quidem, ô Romani  
milites, hic pulchrum est mori: vos interrogati, quo  
loco ducem vestrum amiseritis, memineritis dicere, apud  
Orchomenum. quâ voce suos revocavit. Hic item HE-  
ROS simile perpetravit: non eadem lineâ, non iisdem  
verbis, sed eadem notâ: at majori cum periculo; imò &  
cum vitæ jacturâ. Nam ut signiferos militesq; jam vi-  
cissim in hostem ruentes acrius incitaret; ipse prioribus  
verbis vix prolatis, incitato stimulis equo, in globum  
agrestium perrumpit, & unum cum primis glande sclo-  
peto breviori impulsâ petit trajicitq;. Is, vulnere haud  
tardante, avido vicissim & rabioso impetu insurgens in  
Ducem, omnibus armis, ob defatigationem ex itinere  
longinquo contractam, & ob anni tempus admodum  
æstuosum, plane exutum, in dorso supra coxendicem,  
quâ spinæ conjungitur, alapardâ graviter eum vulne-  
rat: sed graviter tantum: nam cùm videret agrestem il-  
lum furenti & exacerbato ad vindictam animo in sese  
pro ruere, aversum propè latus equi paululum se incur-  
vans demiserat. quod nisi fecisset, lethaliter inibi ab eo-  
dē fuisset confossus. Cùm autē reliqui milites contra vo-  
luntatem etiam ADOLPHI istud persentiscerent, con-  
estim flagranti animo, quamvis continuo viâ laborare  
defatigati & æstu intolerabili omnes vehementer lasi,  
ntea ne pedem ex loco movere voluissent, in agrestes  
irru-



irruunt, & universos internecioni dedunt. Equidem vul-  
nus adeò durum & immiter erat, ut ex patenti eius hiatu  
acceptum per os spiritum MAGNUS ILLE HEROS  
redderet. Hæc fortitudo, si quæ alia : hæc heroicæ &  
magnanimæ mentis specimina, ô quam præclara ; ô  
quam pulchra ! si virtutem spectes : sed ô quam pericu-  
losa ! si grave illud vulnus. Videte, videte tanti principis  
corpus laceratum : videte perforatum : videte spiritum  
per hiatum violentum & sanguine maculatum exeun-  
tem : videte pulmonem nativo spiritu privatum & vi-  
scera aperta : aperta ob suorum salutem : ob virtutem :  
ob victoriæ gloriam. Laudate mihi Iulium Cæsarem ;  
laudate mihi Syllam : at HUNC mihi PRINCIPEM,  
HUNC HEROEM honorate : hoc præsertim ævo. quis  
enim talia jam faciat ? imò quis audeat ? Quamvis au-  
tem ADOLPHUS ex periculoso hoc vulnere tam gra-  
viter laboraret, ut multi de ejus vita dubitarent, tamen  
exercitui & suis semper adesse, & salutaria illis sua con-  
silia impertire volebat. Quin & in hoc bello generosi,  
celsiq; animi sui lenitatem & mansuetudinem omnibus  
probabat : nam cum Dithmarsî, tribus millibus eorum  
cæsis, per duos sacrorum mystas & epistolam supplicem  
à principibus pacem peterent, & inter deliberandum  
in ADOLPHI prætorio consilia agerentur, utrum  
Dithmarsos bello ad excidium usq; persequi, an dediti-  
one in fidem accipere præstaret, ipse primus omnium  
in lecto æger decumbens apertè prolixè suadebat, ut  
conditiones proponerentur, quibus pacem hostibus pe-  
tentibus darent. quæ sententia, ut ardentis veræq; pieta-  
tis & clementiæ plena, ita omnibus arrisit, ut statim u-  
no quasi ore probata & accepta ; Dithmarsî etiam certis  
conditionibus, vexillis scilicet & diplomatibus IO ANNI

D 3

regi



regi Daniæ & principibus Holfatiæ olim ablatis, primum  
restitit, armis tormentisq; bellicis omnibus in unum lo-  
cum comportatis, deprecatione veterum injuriarum do-  
mum Holfaticæ & genti Cimbricæ illatarum factâ, & ho-  
magio tandem tollenni ritu præstito, in fidem à Princi-  
pibus recepti sint. Ita ADOLPHI MAGNANIMI HE-  
ROIS auspicio, Dithmarsî in regis Daniæ & principum  
Holfatiæ potestatem bello subacti & coacti pervenerunt.  
Dithmarsî; qui per quingentos circiter annos principum  
horum majoribus tot luctuosas strages inexplebili sævi-  
tiâ intulerant, & non liberam suam libertatem pertinaci-  
simâ animorum cōstantiâ tutati fuerant: qui tot inspera-  
tas incursiones in finitimos horrendâ libidine fecerant:  
qui toties in principes Cimbricos virulentam immode-  
stæ & petulantis linguæ proterviam effuderant: qui ob  
fortunæ secundos successus inflati ita etiam insolescere  
& ferocire coeperant, ut cæcâ persuasione occæcati & in-  
fecti se invictos esse crederent, & regionem suam tam  
insigniter, & ab ipsâ naturâ & operibus munitam nullis  
viribus aut stratagematis subigi posse confiderent. illi,  
illi inquam, unius mensis circuitu debellati, fusi, victi, &  
ad obedientiam legitimo & clementi magistratui in per-  
petuum præstandam coacti sunt. Ita ADOLPHUS ma-  
culas à Dithmarsis suis majorib9 aspersas abolevit: ita de-  
trimentum & dedecus illis ipsis illatum refarciuit; & qui à  
nullo per tot annos vinci potuerant, vicit. Hæc ADOL-  
PHI virtus & in rebus militaribus industria toti orbi  
innotuit: in regum & principum aulis; in nobilium ar-  
cibus; in civium domibus; in Musarum Academiis  
ADOLPHUS erat, omnes eum celebrare: omnes eum  
susplicere: omnes honorare. His autem feliciter per-  
petratis, se exteris quoq; non tantum quoad famam,  
sed



sed etiam quoad faciem conspiciendum insigni nobili-  
um virorum comitatu præbuit. Et cum in Angliam  
ad Reginam ELISABETHAM perveniret, ma-  
ximâ apud eam in existimatione ob præclaras & heroi-  
cas virtutes, & in militiâ probatam fortitudinem &  
peritiam fuit: tantâ etiam, ut ab eadem in GARTERII  
spectabilem, multisq; regibus & principibus ornatum  
ordinem cooptatus pulcherrimum istud symbolum;  
HONI SOIT, QUI MALT PENSE,  
malus ille, qui malè cogitat, in perpetui amoris & bene-  
volentiae testaram acceperit: & plurimis insuper aliis  
regiis muneribus ab eadem donatus regioq; comitatu  
dimissus sit. Sic etiam illud suâ virtute & gloriâ pro-  
meruit, ut magno applausu Romano-germanici imperii  
summus belli Dux electus sit, & ad vitæ finem summâ  
cum celebritate permaneret. Taceo jam quâ  
fortitudine & laude obsidioni Gothanæ & pluribus  
aliis expeditionibus decoris & fulgentibus armis ani-  
moq; heroico suspiciendus interfuerit. Quis enim  
illa omnia unâ oratione descripserit? alii papyro, alii  
pennæ reservanda. Jam si surrexerint Athenienses &  
suum Miltiadem; Spartani Lycurgum; Epirotæ Pyr-  
rhum; Trojani Hectorem; Macedones Alexandrum;  
Pœni Hannibalem; Romani Fabium Maximum, Sci-  
pionem, Julium Cæsarem: & alii alios laudaverint:  
eosq; maxima facinora commisisse, pro patriâ multa  
perpeffos, & gloriâ immortalī dignos esse contende-  
rint: eos non culpabimus: tantum aberit, ut eadem  
etiam cum illis dicturi simus. Sed nos interea quoq;  
HUNC HEROEM, HUNC ADOLPHUM  
gentis Cimbricæ & domus Holsaticæ ornamen-  
tum esse, heroicis suis facinoribus animi sui virtu-  
tem palam demonstrasse, pro patriâ fortiter pugnas-  
se, vulne-



vulnera perpeſſum, & alia lubrica vitę pericula ſubiſſe,  
dicemus; obnixęq; rogabimus, ut pari nobiſcum mo-  
deſtiã, quã ſuis, quę meriti erant, non denegavimus,  
huic quoq; noſtro herõi, noſtro principi ſuas laudes non  
tantum inſequebantur, ſed etiam maioribus eum  
hiſce digniſſimum eſſe haud invitę, verę tamen, fatean-  
tur. Gręci ſuis, qui ſe fortiter in bellis pro patrię liber-  
tate adſerendã geſſerant, aliisq; beneficiis patriam adſe-  
cerant, ſtatuas, vel lapideas, vel æreas, eaſq; vel pau-  
cas, vel plures pro beneficiorum magnitudine pone-  
bant; ut æterna eorum apud poſteros exſtaret memo-  
ria. certę & hic HEROS non unã ſed multis ſtatuis ob  
tot in patriam merita, ob tot inclitas, quibus fulgebat,  
virtutes, honorandus eſſet: ut & poſteri hæc cogno-  
ſcerent, & ad ſimilia tentanda vel perpetranda excita-  
rentur. Nos quidem ob iſta merita, cū æream,  
aut lapideam non poſſimus, chartaceam hanc pi-  
eratis, patrię, ſubditorum, & exterorum  
nomine illi ponimus:

ILLV-



ILLVSTRISSIMO  
ET FORTISSIMO PRINCIPI  
DN. ADOLPHO, HEREDI NORVEGIÆ,  
DUCI SCHLESVICI, HOLSATIÆ, STOR-  
MARIÆ ET DITHMARSIAE, COMITI IN  
OLDENBURG ET DEL-  
MENHORST,

OB SUMMAS ET HEROICAS  
VIRTUTES, PLURIMAQUE IN  
PATRIAM MERITA,

*PIETATIS ASSERTORI,*

*JUSTITIÆ CULTORI,*

*LEGUM VINDICI,*

*PATRIÆ PROPUGNATORI,*

*HUJUSQUE FINIUM AMPLIFICATORI,*

*DOMUS HOLSATICÆ ORNAMENTO,*

*ROMANO-GERMANICI IMPERII SUMMO BELLI DUCI,*

*HEROI CIMBRICO,*

*ORDINIS GARTERII SOCIO,*

*PRINCIPI FORTISSIMO ET MAGNANIMO,*

PIETAS, PATRIA, SUBDITI, EXTERI,  
ÆTERNÆ MEMORIÆ CONSERVAN-  
DE GRATIA PONIMUS.

Hanc tibi statuam, ADOLPHE, posuimus; papy-  
raceam: æream, utinam potuissemus! nam hac quam il-

E

lâ te



lāte digniorem, quis est qui audeat, aut possit inficiari?  
Ex his jam, auditores, ex his, inquam, de ADOLPHI  
virtutibus iudicate: iudicate, & eas suspicite: non enim  
ista ad virtutum effigiem delineata, sed ad cribrum di-  
cta & prolata: non ex conjecturarum fallacium lacunis;  
sed ex limpidissimis veritatis fontibus hausta & petita.  
Ex his etiam de rebus fortiter præclareq; ab eodem gestis  
iudicate: nam de istis quoq; non ad umbram & nebulas,  
sed ad fidem & lucem omnia proposita. Neq; tantum  
ex his, quæ à me dicta sunt, sed etiam ex illis, quæ vobis  
nota, & ab aliis decantata, ADOLPHI laudes ponde-  
rate. Et quæ non expressi, illa vos apud mentem  
vestram repetite. Parcite verò, parcite, & veniam  
date; si de singulis non satis concinnè, non satis dextrè  
dixi. Feci quod potui, quod volui, quod debui. Te  
quoq; ô ADOLPHE HEROS fortis & magnanime,  
te oro, ne mihi succenseas, ne me reprehendas; si hac  
forsan oratione clarissimas & immortales tuas laudes  
obscuravi: certè enim non volui. Voluntatem am-  
plexere: & mentem ingenuè enim & apertè fateor, me  
amplitudine laudum tuarum, & rerum à te fortiter ge-  
starum multitudine oppressum, plura dicere non potuisse.  
Hic ergò subsistamus; hic finiamus. Vos ô sancta  
coeli sidera, vos oro, ut huius tanti Herôis nomen inter  
vos quoq; floreat, inter vos quoq; vigeat. Te quoq;  
veneranda Diva, ô FAMA, te, inquam, imploro, ut  
huius Herôis famam & gloriam nullo umquam seculo  
aboleri aut mori patiaris; sed in æternum apud omnem  
posteritatem in universo mundo, etiam apud Antipo-  
das propalare & conservare haud subterfugas. Te  
autem, ô æterne & adorande DEUS, qui Trinus in uni-  
tate, & unus in Trinitate, te adoro; te submisso animi  
spiri-



spiritu obsecro, ut similes Herôas in Holsaticâ domo excitare, Reverendissimumq; & illustrissimum Holsatiae Principem IOANNEM ADOLPHUM, hujus ADOLPHI filium, Spiritu tuo venerando & adorando illustrare, stabili & felici gubernatione, vegeto animo, sanoq; corpore, & benedictione paternâ beare & munire, patriæq; & imperio diutissimè conservare, clementer velis. Id ut facias, ô DEUS; te devotissimis & altissimis suspiriis oro, rogo, obsecro; ô DEUS.

**F I N I S.**





spiritum obsecro, ut similes facias in Holstia domos ex-  
 erare, Reverendissimi & Illustrissimi Holstia-  
 nae Principum JOANNES ADOLPHUM, PAULUM  
 ADOLPHUM filium spiritum in venerando & abbatibus  
 illustre, habili & solici observatione, vegeto animo  
 animo, corpore, & benevolentia pietatis bene & mi-  
 nime, patris & imperio divinis conservare, etc.  
 memet velis. In hac facias. O D E U S : I T E M  
 animis & alacritas spiritus oro, rogo,  
 obsecro : O D E U S .

F I N I S





